

ALL INDIA RADIO
RNU :: KOLKATA
BENGALI TEXT BULLETIN

DATE : 27.06.2017

TIME : 07.35 A.M.

বিশেষ বিশেষ খবর:

১। দার্জিলিঙ পাহাড়ে গোর্খা জনমুক্তি মোর্চার ডাকা অনির্দিষ্টকালীন বন্ধ আজ ত্রয়োদশ দিনে পড়ল। স্বাভাবিক জীবনযাত্রা অচল, খাদ্যসঙ্কট তীব্র ও চা-শিল্প সঙ্কটে।

২। রাজ্যসরকার আগামী শিক্ষাবর্ষ থেকে কন্যাশ্রী প্রকল্পের সাফল্য ও আন্তর্জাতিক স্বীকৃতি পাঠ্যপুস্তকের অন্তর্ভুক্ত করার সিদ্ধান্ত নিয়েছে।

৩। এক কিশোরীকে ধর্ষণের অভিযোগে বিশ্বজিৎ হালদার নামে এক যুবককে আদালত দু'দিনের বিচার বিভাগীয় হেফাজতে পাঠিয়েছে।

৪। মুর্শিদাবাদের ডোমকল থানার কুসাবেড়িয়ায় দুষ্কৃতির গুলিতে এক তৃণমূল কংগ্রেস কর্মীর মৃত্যু হয়েছে।

দার্জিলিঙ পাহাড়ে গোর্খা জনমুক্তি মোর্চার ডাকা অনির্দিষ্টকালীন বন্ধ আজ ত্রয়োদশ দিন। গতকাল দ্বাদশ দিনে সকাল ৬টা থেকে ১২ ঘণ্টার জন্য আংশিক শিথিল করা হয়। গোর্খা জনমুক্তি মোর্চার কেন্দ্রীয় কমিটি ঈদ উপলক্ষে এই বন্ধ শিথিল করে। তবে শুধুমাত্র ইসলাম ধর্মাবলম্বী মানুষদেরই গাড়ি ব্যবহারের অনুমতি দেওয়া হয়।

আমাদের জেলা সংবাদদাতা স্বপন পাল জানাচ্ছেন, বন্ধ শিথিল করার সময় কোনো অপ্রীতিকর ঘটনার খবর মেলেনি। সর্বত্রই কড়া পুলিশি প্রহড়া ছিল। দার্জিলিঙের ইসলামিয়া মসজিদে মুসলিম ধর্মাবলম্বী ঈদের নামাজে সামিল ছিলেন। দোকান বাজার সবই বন্ধ ছিল। অন্যান্য যানবাহনও চলাচল করেনি।

এদিকে, দার্জিলিঙ পাহাড়ে একটানা এই বন্ধের জেরে যে তীব্র খাদ্যসঙ্কট দেখা দিয়েছে, তার মোকাবিলায় গোর্খা জনমুক্তি মোর্চার পক্ষ থেকে গতকাল দার্জিলিঙে জনসাধারণের মধ্যে শাকসজ্জি বিলি করা করা হয়। শিলিগুড়ি থেকে আনা এক গাড়ি বোঝাই শাকসজ্জি সিংমারি ও চক্‌বাজার সহ বিভিন্ন জায়গায় বিলি করা হয় বলে জানা গেছে।

এদিকে, কালিম্পাঙে গতকাল হরকাবাহাদুর ছেত্রীর জন আন্দোলন পার্টি জে.এ.পি.-এর পক্ষ থেকে এক মিছিল বের করা হয়। প্রাক্তন সেনাকর্মীদের পক্ষ থেকেও গোর্খাল্যান্ডের সমর্থনে এক মিছিল বের করা হয়।

অন্যদিকে, আলোচনার মাধ্যমে পাহাড় সমস্যার সমাধানের পথ খুঁজতে হবে বলে, পাহাড়ে নিযুক্ত পুলিশ কর্তাদের একাংশ মত প্রকাশ করেছেন। এডিজি বিবেক সহায় এই পুলিশ আধিকারিকদের সঙ্গে কথা বলে এব্যাপারে একটি রিপোর্ট তৈরী করেছেন। আজ মুখ্যমন্ত্রীর হাতে রিপোর্টটি তুলে দেওয়া হতে পারে বলেও জানা গেছে।

পাহাড়ে অচলাবস্থার জেরে চা শিল্প ব্যাপক সঙ্কটে। এই মরশুমে দ্বিতীয় দফায় চা-পাতা তোলার সময় অনির্দিষ্টকালীন বন্ধের দরুণ তা মার খাচ্ছে। গত বছর যেখানে দ্বিতীয় দফায় ১৮ লক্ষ কেজি চা পাতা তোলা হয়েছিল। সেখানে এবছরে এ পর্যন্ত মাত্র ২ লক্ষ কেজি চায়ের উৎপাদন হয়েছে। পাহাড়ের পরিস্থিতি স্বাভাবিক না হওয়া পর্যন্ত চা-বাগানের অচলাবস্থা কাটানো সম্ভব নয় বলে প্রশাসনিক সূত্রে জানা গেছে।

০০০০০

দার্জিলিঙ পাহাড় নিয়ে কথা বলতে স্থানীয় বিধায়ক ও দার্জিলিঙ পুরসভার চেয়ারম্যান অমর সিং রাই-এর নেতৃত্বে গোখাঁ জনমুক্তি মোর্চার তিন সদস্যের এক প্রতিনিধি দল গতকাল রাজভবনে রাজ্যপাল কেশরীনাথ ত্রিপাঠী-র সঙ্গে সাক্ষাৎ করেন। পাহাড়ের বর্তমান পরিস্থিতি নিয়ে তারা রাজ্যপালকে অবহিত করেন এবং কেন্দ্রের ভূমিকা নিয়েও অসন্তোষ ব্যক্ত করে জিটিএ থেকে তাদের ইস্তফাপত্র জমা দেন বলে জানা গিয়েছে।

অন্যদিকে, রাজ্যপাল আলোচনার টেবিলে বসে সমস্যা মেটানোর জন্যে তাদের আবেদন জানান। তাঁরা আলোচনার জন্য প্রস্তুত বলে জানিয়ে ঐ প্রসঙ্গে কেন্দ্রকেই উদ্যোগ নিতে হবে বলে অভিমত প্রকাশ করেন। প্রতিনিধি দলে অন্যান্যদের মধ্যে ছিলেন গোখাঁল্যান্ড আঞ্চলিক প্রশাসনের প্রাক্তন চেয়ারম্যান লোপসং লামা ও প্রাক্তন ভাইস চেয়ারম্যান রবীন্দ্র লামা।

০০০০০

রাজ্য সরকার আগামী শিক্ষাবর্ষ থেকে কন্যাশ্রী প্রকল্পের সাফল্য ও আন্তর্জাতিক স্বীকৃতির কথা পাঠ্যপুস্তকে যুক্ত করার সিদ্ধান্ত নিয়েছে। রাষ্ট্রসভ্যের তরফে সম্প্রতি নেদারল্যান্ডের হেগ শহরে বিশ্বের ৬৩ টি দেশের ৫৫২ টি জনপরিষেবা প্রকল্পের মধ্যে থেকে কন্যাশ্রী প্রকল্পকে প্রথম নির্বাচিত করে মুখ্যমন্ত্রী মমতা ব্যানার্জির হাতে পুরস্কার তুলে দেওয়ার ঘটনাটি আগামী শিক্ষাবর্ষ থেকে পাঠ্যসূচীতে যুক্ত করা হবে বলে শিক্ষামন্ত্রী পার্থ চট্টোপাধ্যায় জানিয়েছেন। এজন্যে শিক্ষা দপ্তর ইতিমধ্যেই সিলেবাস কমিটিকে একটি প্রস্তাব পাঠিয়েছে। উল্লেখ্য ২০১৩ সালের অক্টোবর মাসে চালু হওয়া কন্যাশ্রী প্রকল্পকে ইউনিসেফ ইতিমধ্যেই শ্রেষ্ঠ ছোটদের প্রকল্প হিসাবে সম্মানিত করে। এরপরেই রাজ্য সরকার প্রকল্পটিকে পাঠ্যপুস্তকে অন্তর্ভুক্ত করার সিদ্ধান্ত নেয়।

০০০০০

এবারের তরঙ্গের বিষয় : দক্ষতা ও প্রযুক্তির হাত ধরে নতুন ভারত।
আলোচনায় অংশ নিয়েছেন অধ্যাপক মৃগাল বৈদ্য রায় এবং কম্পিউটার বিশেষজ্ঞ চন্দন মজুমদার। সঞ্চালনায় সুজাতা মিত্র।

অনুষ্ঠানটি শোনা যাবে আজ রাত ৮টায় আকাশবাণী কলকাতার গীতাঞ্জলি এবং রাত সাড়ে ৯টায় এফ. এম. গোল্ড প্রচারতরঙ্গ।

০০০০০

বর্ধমান আদালতে এক কিশোরীকে ধর্ষণের অভিযোগে বিশ্বজিৎ হালদার নামে এক যুবককে গতকাল ২ দিনের বিচারবিভাগীয় হেফাজতে পাঠানোর নির্দেশ দিয়েছে। আগামীকাল তাকে শিশুদের উপর যৌন নির্যাতন সংক্রান্ত বিশেষ আদালতে তোলার নির্দেশ দেওয়া হয়েছে। পুলিশ সূত্রে জানা গেছে, ১৮ই জুন থেকে ২৩শে জুন, পূর্ব বর্ধনাম জেলার বেচারহাটের বাসিন্দা বিশ্বজিৎ এক কিশোরীকে কয়েকবার ধর্ষণ করে বলে অভিযোগ। রবিবার মেয়েটির অভিযোগের ভিত্তিতে বর্ধমান মহিলা থানার পুলিশ ওই যুবককে গ্রেপ্তার করে।

০০০০০

নদীয়ায় আবার এক ভূয়ো ডাক্তারের হৃদিশ মিলেছে। হাঁসখালি থানার পুলিশ বাপি নাথ নামে ঐ চিকিৎসককে বগুলা থেকে গ্রেপ্তার করে। তাকে গতকাল রানাঘাট আদালতে তোলা হলে ১৪ দিনের জেল হেফাজতে পাঠানো হয়।

পুলিশ জানিয়েছে, বাপি নাথের বাড়ি উত্তর ২৪ পরগণার বনগাঁয়। দীর্ঘদিন ধরে তিনি নিজেকে এম.বি.বি.এস. ডাক্তার পরিচয় দিয়ে চেম্বার চালাচ্ছিলেন। তার কাছেই চিকিৎসাধীন এক মহিলার অভিযোগের ভিত্তিতে পুলিশ তাকে গ্রেপ্তার করে। তার কোনো এম.বি.বি.এস. ডিগ্রী নেই। শুধুমাত্র আয়ুর্বেদিক ডিগ্রী আছে বলে পুলিশ জানিয়েছে।

এনিয়ে, জেলায় ৩ জন ভূয়ো ডাক্তার ধরা পড়লো। এর আগে চাপড়া ও হাঁসখালি থেকে ২ ভূয়ো চিকিৎসককে ধরা হয়।

০০০০০

মুর্শিদাবাদের ডোমকল থানার কুসাবেড়িয়ায় দুষ্কৃতীদের গুলিতে এক তৃণমূল কংগ্রেস কর্মী খুন হয়েছেন। পুলিশ জানিয়েছে, বছর ৩৫-এর রেন্টু খালিখা গতকাল সন্ধ্যায় মোটর সাইকেলে চেপে বাড়ি আসার সময় কয়েকজন দুষ্কৃতী তাকে থামতে বলে। এরপরই দুষ্কৃতীরা তাকে লক্ষ্য করে গুলি করে। স্থানীয় মানুষজন ডোমকল হাসপাতালে নিয়ে যাবার পথেই রেন্টুর মৃত্যু হয়। গোষ্ঠীদ্বন্দ্বের কারণেই এই খুন বলে পুলিশের প্রাথমিক অনুমান। দুষ্কৃতীদের সন্ধানে তল্লাশি শুরু হয়েছে।

০০০০০

পশ্চিম বর্ধমানের রাণীগঞ্জ থানার মঙ্গলপুরে আগ্নেয়াস্ত্র সহ এক ব্যক্তিকে গ্রেপ্তার করা হয়েছে। রাজেন্দ্র প্রসাদ নামে ঐ ব্যক্তির বাড়ি বিহারে। গোপন খবরের ভিত্তিতে পাঞ্জাবি মোড়ে বাস থেকে নামার পর পুলিশ তাকে গ্রেপ্তার করে। তার কাছ থেকে একটি কার্বাইন ২টি ম্যাগাজিন ও ২০ রাউন্ড কার্তুজ পাওয়া গেছে। সে বীরভূমে অস্ত্র বিক্রি করতে যাচ্ছিল বলে পুলিশ জানিয়েছে।

ধৃত ব্যক্তিকে গতকাল আসানসোল আদালতে তোলা হলে তাকে ৩ দিনের পুলিশ হেফাজতে পাঠানো হয়।

০০০০০

বীরভূমের লাভপুরে এক ব্যবসায়ীকে গতকাল ছুরি দিয়ে খুন করা হয়। বছর ২৯-এর আনোয়ার শেখ ওরফে রিপনকে, পিয়ারুল শেখ ছুরি দিয়ে খুন করে বলে অভিযোগ। রিপনের লোহা ও টিন ভাঙার ব্যবসা রয়েছে। রিপনের মৃত্যুর পরই স্থানীয় বাসিন্দারা লাভপুর থানা ঘেরাও করে বিক্ষোভ দেখায়। পুলিশ এই ঘটনায় পিয়ারুলকে গ্রেপ্তার করেছে।

০০০০০

দক্ষিণ দিনাজপুরের গঙ্গারামপুর থানার ভাদরা গ্রামে এক গৃহবধূকে খুন করার অভিযোগে পুলিশ তার শ্বশুর-শাশুড়ি ও স্বামীকে গ্রেপ্তার করেছে। আমাদের জেলা সংবাদদাতা জানাচ্ছেন, মৃত কুলসুমা বিবিকে তার শ্বশুর বাড়ির লোকজন প্রায়ই মারধোর করত, গতকাল সকালে ঈদের নমাজ সেরে ফিরে এসে প্রতিবেশীরা কুলসুমাকে গলায় ফাঁস লাগা অবস্থায় বুলতে দেখে। এই ঘটনায় ঐ গৃহবধূর বাপের বাড়ির লোক ও প্রতিবেশীরা ক্ষোভে ফেটে পড়ে। তারা কুলসুমার শ্বশুর-শাশুড়ি ও স্বামীকে বেধড়ক মারধোর করে। গঙ্গারামপুর থানার পুলিশ পরিস্থিতি সামাল দিতে ব্যর্থ হলে নিকটবর্তী ক্যাম্প থেকে বিএসএফ এক জওয়ানরা এসে পরিস্থিতি নিয়ন্ত্রনে আনে।

০০০০০

উত্তর ২৪ পরগনার গুমা স্টেশনের কাছে সোমবার রাতে আপ বনগাঁ লোকালের মহিলা কামরায় দুষ্কৃতীদের পাথর ছোঁড়ার ঘটনায় যাত্রীদের মধ্যে ব্যাপক আতঙ্কের সৃষ্টি হয়। গুমা স্টেশন ছাড়ার পরই রেললাইনের পাশ থেকে মহিলা কামরা লক্ষ্য করে পাথর ছোঁড়া হয়। এক মহিলা যাত্রীর চোখে আঘাত লাগে। পাথরের আঘাতে বেশ কয়েকজন যাত্রী ও হকার আহত হয়েছেন।

০০০০০

উত্তর দিনাজপুর জেলার ইটাহারে ৫টি উন্নতমানের টাওয়ার ল্যাম্প পোস্ট লাগানো হয়েছে। জেলা পরিষদের আর্থিক আনুকূল্যে ২৫ লক্ষ টাকা ব্যয়ে দুর্গাপুর, গুলন্দর ১ ও ২ সহ ৫টি অঞ্চলের গুরুত্বপূর্ণ বাজার এলাকায় এগুলি বসানো হয়। রবিবার সন্ধ্যায় এই ল্যাম্প পোস্টগুলির উদ্বোধন করেন বিধায়ক অমল আচার্য।

০০০০০

পশ্চিম বর্ধমানের দুর্গাপুরের সোনার তরী বিদ্যাসাগর পল্লিতে ৩৫ বছর বয়সী কৃষ্ণ বাউড়ি এবং ৩২ বছরের মাম্পি বাউড়ির মৃতদেহকে নিয়ে এলাকায় উত্তেজনা ছড়ায়।

বিবাহিত মাম্পীর সঙ্গে কৃষ্ণ-র বিবাহ বহির্ভূত সম্পর্ক ছিল বলে অনুমান। প্রাথমিক ধারণা করা হচ্ছে, কৃষ্ণ মাম্পির গলায় ফাঁস দিয়ে খুন করে, এরপর সে নিজেও আত্মঘাতী হয়। পুলিশ দেহগুলিকে ময়নাতদন্তের জন্য পাঠিয়েছে।

০০০০০

ঝাড়গ্রামের এমপিএস রিসর্ট-এর চুরি যাওয়া ৫০ বস্তা প্লাস্টিক তৈরীর কাঁচামাল গতকাল পুলিশ উদ্ধার করেছে। গোপনসূত্রে খবর পেয়ে, শহরের একটি গুদামে পুলিশ অভিযান চালায়। ঐ গুদামের মালিককে গ্রেপ্তার করা হয়েছে। আজ তাকে আদালতে তোলা হবে।

উল্লেখ্য, এই কাঁচামাল দিয়ে এমপিএস প্লান্টে মিনারেল ওয়াটারের বোতল এবং জার তৈরী করা হত। ঘটনাস্থল থেকে পুলিশ একটি লরিকেও আটক করেছে।

০০০০০

বাঁকুড়া জেলার জয়পুরে স্থানীয় পঞ্চায়েত সমিতির উদ্যোগে গতকাল স্কুল পড়ুয়াদের নিয়ে ঐতিহ্য যাত্রা নামে এক অভিনব সাইকেল মিছিলের আয়োজন করা হয়। রাজ্যের মন্ত্রী শ্যামল সাঁতরা, পঞ্চায়েত সমিতির সভাপতি নবকুমার রুই দাস সংশ্লিষ্ট এলাকায় মন্দিরগুলো ঘুরে দেখেন। ছাত্রছাত্রীদের মধ্যে স্থানীয় প্রত্নসৌধগুলির বিষয় সচেতনতা গড় তোলাই কর্মসূচীর উদ্দেশ্য ছিল।

০০০০০

পশ্চিমবঙ্গ মিষ্টান্ন ব্যবসায়ী সমিতি বাংলার মিষ্টির উপর থেকে পণ্য পরিষেবা কর প্রত্যাহারের দাবি জানিয়েছে। কলকাতা প্রেস ক্লাবে গতকাল এক সাংবাদিক বৈঠকে সমিতির সাধারণ সম্পাদক রবীন্দ্র কুমার পাল বলেন, বাংলায় বিশুদ্ধ ছানা দিয়ে মিষ্টি তৈরী হয় যা ২৪ ঘণ্টা পর খাবারের অযোগ্য হয়ে পড়ে। ফলে অনেক মিষ্টান্নরই অপচয় হয়।

০০০০০